

四庫全書

史部

欽定四庫全書

欽定續通志卷四百九

列傳

宋一百十三

吳潛

程元鳳

江萬里

王燾

章鑑

陳宜中

文天祥

吳潛字毅夫宣州寧國人秘閣修撰柔勝之季子嘉定

十年進士第一授承德郎簽鎮東軍節度判官改遷廣德軍判官丁父憂服除授秘書省正字遷校書郎添差通判嘉興府權發遣嘉興府事轉朝散郎尚書金部員外郎紹定四年遷尚右郎官都城大火潛上疏論致災之由願陛下齋戒修省恐懼對越閤官之竊弄威福者勿親女寵之根萌禍患者勿昵以暗室屋漏為尊嚴之區以恒舞酣歌為亂亡之宅庶幾天意可回天災可息又言重地要區當豫畜人才以備患又貽書丞相史彌

遠論事一曰格君心二曰節奉給三曰賑恤都民四曰
用老成廉潔之人五曰用良將以禦外患六曰革吏弊
以新治道授直寶章閣改吏部員外郎遷太府少卿淮
西總領又告執政論用兵復河南不可輕易兵事一開
調度寢廣百姓狼狽何所取資自後興師入洛潰敗失
亡潛之言卒驗遷大府卿兼權沿江制置知建康府江
東安撫留守上疏論保蜀之方護襄之策防襄之筭備
海之宜進取有甚難者三事端平元年詔求直言潛所

陳九事一曰顧天命以新立國之意二曰植國本以廣傳家之慶三曰篤人倫以為綱常之宗主四曰正學術以還斯文之氣脈五曰廣畜人才以待乏絕六曰實恤民力以致寬舒七曰邊事當鑒前轍以圖新功八曰楮幣當權新制以解後憂九曰賊盜當探禍端而圖要策以直論忤時相罷奉千秋鴻禧祠改秘閣修撰權江西轉運副使兼知隆興府主管江西安撫司擢太常少卿奏造斛斗輸諸郡租寬恤人戶培植根本凡十五事進

右文殿修撰集英殿修撰樞密都承旨督府參謀官兼知太平州五辭不允又言和戰成敗大計宜急救襄陽等事貽書執政論京西既失當招收京淮丁壯為精兵以保江西權工部侍郎知江州辭不赴請養宗子以係國本以鎮人心改權兵部侍郎兼檢正論士大夫私意之弊以為襄漢潰決興汚破亡兩淮俶擾三川陷沒欲望陛下念大業將傾士習已壞以靜專察郡情以剛明消衆慝警于有位各勵至公毋以術數相高而以事功

相勉毋以陰謀相訐而以識見相先協謀并知戮力一心則危者尚可安而衰證尚可起也又請分路取士以收淮襄之人物試工部侍郎知慶元府兼沿海制置使改知平江府條具財計凋敝本末以寬郡民與轉運使王埜爭論利害授寶謨閣待制提舉太平興國宮改玉隆萬壽宮試戶部侍郎淮東總領兼知鎮江府言邊儲防禦等十有五事改寶謨閣直學士權兵部尚書浙西制置使申論防拓江海團結措置等事進工部尚書改

吏部尚書兼知臨安府乃論艱屯塞困之時非反身修德無以求亨通之理乞遴選近族以係人望而俟太子之生帝嘉納以臺臣徐榮叟論列提舉南京鴻慶宮遂請致仕母憂服除轉中大夫試兵部尚書改端明殿學士簽書樞密院事進封金陵郡侯以亢旱乞罷免改資政殿學士提舉洞霄宮改知福州兼本路安撫使徙知紹興府浙東安撫使召同知樞密院兼參知政事入對言國家之不能無弊猶人之不能無病願陛下篤任元

老為醫師博采衆益為醫工使臣輩得効牛溲馬勃之助不辱陛下知人之明淳祐十一年入為參知政事拜右丞相兼樞密使明年以水災乞解機政以觀文殿大學士提舉洞霄宮又四年授沿海制置大使判慶元府至官條具軍民久遠之計告于政府奏皆行之以久任丐祠且累章乞歸田里進封慶國公判寧國府還家以醴泉觀使兼侍讀召入對論畏天命結民心進賢才通下情帝嘉納拜特進左丞相進封慶國公奏乞令在朝

之臣各陳所見以決處置之宜改封許國公元兵渡江
攻鄂州別將由大理下交趾破廣西湖南諸郡潛奏今
鄂渚被兵湖南擾動推原禍根良由近年姦臣儉士設
為虛議迷國誤軍其禍一二年而愈酷附和逢迎嬖阿
諂媚積至于大宋靖臣年將七十捐軀致命所不敢辭
深所痛者臣交任之日上流之兵已踰黃漢廣右之兵
已陷賓榔謂臣壞天下之事亦何哀已又論國家安危
治亂之原蓋自近年公道晦蝕私意橫流仁賢空虛名

節喪敗忠嘉絕響諛佞成風天怒人怨稔成兵戈之禍
積為宗社之憂章鑑高鑄嘗與丁大全同官傾心附麗
躡躑要途蕭泰來等羣小嚙沓國事日非浸淫至于今
日陛下毋使小人翕聚以貽善類之禍沈炎實趙與憲
之腹心爪牙而任臺臣甘為之搏擊姦黨盤據血脈貫
穿以欺陛下致危亂者皆此等小人為之又乞令大全
致仕炎等與祠高鑄霸管州軍不報屬將立度宗為太
子潛密奏云臣無彌遠之材忠王無陛下之福帝怒潛

卒以災論劾落職命下中書舍人洪芹繳還詞頭不報
謫建昌軍尋徙潮州責授化州團練使循州安置潛預
知死日語人曰吾將逝矣夜必雷風大作已而果然四
鼓開霽撰遺表作詩頌端坐而逝時景定三年五月也
循人間之咨嗟悲慟德祐元年追復元官仍還執政恩
數明年以太府卿柳岳請贈諡特贈少師

程元鳳字申甫徽州人紹定元年進士調江陵府教授
端平元年差江西轉運使幹辦公事淳祐元年遷禮兵

二部架閣父憂服闋遷宗學博士以詩禮講榮王府旁
諷曲諭隨時規正多所裨益王亦傾心敬聽輪對極論
世運剝復之機及人主所當法天者理宗覽之曰有古
遺直風六年進秘書丞兼權刑部郎官七年兼權右司
郎官遷著作郎仍權右司郎官輪對指陳時病尤激切
當國者以為厲已旬外知饒州郡初罹水災元鳳訪民
疾苦夙夜究心修城堞置義廩寬誅求察誣證進江淮
荆浙福建廣南都大提點坑冶仍兼知饒州治司歲有

冬夏帳銀悉舉以補郡積年諸稅斂之不足者芝生治所衆以治行之致元鳳曰五穀熟則民蒙惠此不足異也召奏事辭不允遷右曹郎官疏言實學實政國本人才吏治生民財計兵威八事尋兼右司郎官拜監察御史丞相鄭清之久專國柄老不任事臺官潘凱吳燧合章論列清之不悅改遷之二人不拜命去元鳳上疏斥清之罪其言明白正大凱燧得召還有事于明堂元鳳疏言祈天以實不以文又言邊備為當申儆軍實以起

積玩之勢及言濫刑之弊十二年拜右正言兼侍講以
祖諱辭詔權以右補闕繫銜余晦以從父天錫恃恩妄
作三學諸生伏闕上書白其罪狀司業蔡抗又力言之
元鳳數其罪劾之奏上以晦為大理少卿抗為宗正少
卿元鳳又上疏留抗而黜晦以安士心乃命抗仍兼司
業晦予郡升殿中侍御史京城災疏言輟土木無益之
役以濟暴露之民移緇流泛濫之恩以給顛沛之衆務
行寬大之政固結億兆之心旁招俊乂而私昵無濫及

之恩屏去奸私而貪黷無覆出之患謹便壁之防而不使之弄權抑恩澤之請而不至於無節言多剴切寶祐元年兼侍讀遷侍御史言法孝宗八事薦名士二十餘人進尚書吏部侍郎亟辭出關不允有事于南郊元鳳為執綏官答問多所開陳帝因欲幸西太乙宮力諫止之三年遷權工部尚書力求補外特授端明殿學士同簽書樞密院事簽事樞密院事兼權參知政事進參知政事尋進拜右丞相兼樞密使進封新安郡公力辭御

筆勉諭猶周回累日而後治事疏奏正心待臣進賢愛民備邊守法謹微審令八事高孝光寧四朝國史未就奏轉任尤煇領其事纂修成之會丁大全謀奪相位元鳳力辭授觀文殿大學士判福州福建安撫使又力辭依前職提舉洞霄宮開慶兵興上手疏收人心重賞罰團結民兵數事俄起判平江府兼淮浙發運使四上章乞免三年御筆趣行奏免修明局米五萬石拜特進依前職充醴泉觀兼侍讀度宗即位進少保咸淳三年拜

少傅右丞相兼樞密使進封吉國公以言罷依舊少保
觀文殿大學士醴泉觀使乞致仕不許四年罷觀使以
守少保觀文殿大學士致仕卒遺表聞特贈少師元鳳
之在政府也一契家子求貳令元鳳謝之曰除授須由
資其人累請不許乃以先世為言元鳳曰先公疇昔相
薦者以某粗知恬退故也今子所求躐次豈先大夫意
哉矧以國家官爵報私恩某所不敢有嘗遭元鳳論列
者其後見其可用更薦拔之每曰前日之彈劾成其才

也今日之擢用盡其才也

江萬里字子遠都昌人少神雋有鋒穎連舉於鄉入太學有文聲理宗在潛邸嘗書其姓名几研間以舍選出身歷池州教授沿江制置司準備差遣兩浙安撫司幹辦公事召試館職累遷著作佐郎權尚左郎官知吉州創白鷺洲書院兼提舉江西常平茶鹽召為屯田郎官未行遷直秘閣江西轉運判官兼權知隆興府創宗濂書院遷考功郎官命旋寢久之以駕部郎中召遷尚右

兼侍講史嵩之罷相拜監察御史仍兼侍講未幾遷右
正言殿中侍御史又遷侍御史未及拜萬里器望清峻
論議風采傾動一時帝眷注尤厚嘗凶祠省母疾不許
屬弟萬頃奉母歸南康旋以母病聞萬里不俟報馳歸
至祁門得計而議者謂萬里母死秘不奔喪反挾妾媵
自隨於是側目萬里者相與騰謗萬里無以自解坐是
閒廢者十有二年後陸德輿嘗辨其非辜於帝前賈似
道宣撫兩浙辟叅謀官及似道同知樞密院為京湖宣

撫大使以萬里帶行寶章閣待制為參謀官元兵圍鄂
似道以右丞兼樞密使移軍漢陽萬里遷刑部侍郎似
道入相萬里遷權吏部尚書又拜端明殿學士同簽書
樞密院事隨以言者去官後以原職知建寧府兼權福
建轉運使已而加資政殿學士依舊職知福州兼福建
安撫使度宗即位召同知樞密院事又兼權參知政事
萬里始雖俛仰容默為似道用然性峭直臨事不能無
言似道常惡其輕發故每入不能久在位似道以去要

君帝初即位呼為師相至涕泣拜留之萬里以身掖帝云自古無此君臣禮陛下不可拜似道不可復言去似道不知所為下殿舉笏謝萬里曰微公似道幾為千古罪人然以此益忌之帝在講筵每問經史疑義及古人性名似道不能對萬里常從旁代對時王夫人頗知書帝語夫人以為笑似道聞之積慙怒謀逐之萬里四旬祠不候報出關加資政殿大學士知慶元府兼沿海制置使不報予祠後二年知太平州兼提領江淮茶鹽兼

江東轉運使召拜參知政事進封南康郡公既至拜左丞相兼樞密使勾祠加觀文殿大學士知福州辭依舊職提舉洞霄宮又授知潭州湖南安撫大使加特進尋予祠時咸淳九年萬里年七十有六矣明年元兵渡江萬里隱草野間為遊騎所執大詬欲自戕既而脫歸先是萬里間襄樊失守鑿池芝山後圃扁其亭曰止水人莫諭其意及聞警執門人陳偉器手曰大勢不可支余雖不在位當與國為存亡及饒州城破軍士執萬頃索

金銀不得支解之萬里竟赴止水死左右及子鎬相繼投
治中積尸如疊翼日萬里尸獨浮出水上從者草斂之
萬里無子以蜀人王楠子為後即鎬也事聞贈太傅益
國公後加贈太師諡文忠萬頃厯守大郡為提舉江西
常平茶鹽官至正郎城破時郴州守趙崇楸寓居城中
亦死之

王燦字仲潛一字伯晦紹興新昌人登嘉定十三年進
士第知常熟縣紹定四年江淮制置司辟通判泰州五

年差知滁州端平元年知瑞州嘉熙元年提轄左藏東西庫兼提轄封樁下庫二年遷籍田令兼督視幹辦公事淳祐二年改監三省樞密院門乞免所居官詔從之四年再任五年遷太府寺丞秘書丞戶部郎官淮西總領主管右曹六年為尚書左司員外郎賜對乞祠不許七年遷秘書少監以侍御史周坦言罷為福建提點刑獄差知溫州十年差知寧國府遷太府卿寶祐元年兼權兵部侍郎試司農卿疏奏願詔大臣相與憂亂而思

治懼危而圖安哀恫警省修德行政摧抑羣陰之氣燄
保護微陽之根本使內治明如天日外治勁如風霆則
精神運動陽燿昭蘇世道昌明物情熙洽上以迓續天
命於譴告之餘下以固結人心於解紐之際其孰能禦
之以右文殿修撰提舉太平興國宮五年京湖宣撫大
使趙葵辟為判官開慶元年召赴行在授集英殿修撰
樞密都承旨權吏部侍郎景定元年為真侍郎兼太子
左庶子極言正論太子聽而說之帝聞之甚喜二年遷

禮部尚書權吏部尚書加龍圖閣學士知平江府淮浙
發運使五年召赴行在進端明殿學士提舉佑神觀兼
侍讀召赴行在咸淳元年拜簽書樞密院事同知樞密
院事兼權參知政事二年以疾乞祠不許帝遣尚醫視
之復兩乞歸皆不許拜參知政事三年知樞密院事兼
參知政事立皇太子加食邑三辭免官不許乞祠祿乃
授資政事學士知慶元府兼沿海制置使八年加觀文
殿學士提舉萬壽宮兼侍讀詔遣刑部郎官董樸起之

四上疏辭免始從之十年以燾為左丞相章鑑為右丞相並兼樞密使尋授燾特進加食邑乞致仕兩乞辭免皆不許德祐元年兩乞改命經筵又再乞以舊職奉京祠侍讀皆不許右丞相章鑑參知政事陳宜中奏諭留燾以鎮人心以康世道從之燾兩請毋署省院公牘不許又奏乞將臣先賜罷斥臣本志誓死報國願假臣以宣撫招討等職臣當招募忠義共圖興復鑑宜中又奏燾單車絕江已至蕭山乞遣中使趣還治事乃授觀文

殿大學士浙西江東路宣撫招討大使置司在京以備
咨訪乞解大使職名不許進少保左丞相兼樞密使尋
加都督諸路軍馬累辭皆不許奏言今天下所以大壞
至此者正以一私蟠塞賞罰無章故也救之之策在反
其所以壞之之由大明賞罰動合乎天庶幾人心興起
天下事尚可為也因言賈似道誤國喪師之罪於是始
降詔切責似道不忠不孝六月庚子朔日食爚奏日食
不盡僅一分白晝晦冥者數刻陰盛陽微災異未有太

於此者臣待罪首相上佐天子理陰陽下遂萬物外鎮諸侯皆其職也氛祲充塞而未能消生民塗炭而未能拯反覆思之咎實在臣乞罷黜以答天譴答詔不許第降授金紫光祿大夫而已辭降官乞罷斥又不許尋進平章軍國重事辭不許或請出宜中或夢炎出督吳門否則臣雖老無能為若效死封疆亦不敢辭詔三省集議乞罷平章事不許京學生上書詆宜中宜中亦上疏乞骸骨初宜中在相位政事多不關白燭或謂京學之

論竇燭噉之詔燭與宜中必難共處兼燭近奏乞免平章侍經筵辭氣不平遂罷燭平章依前少保特授觀文殿大學士充醴泉觀使燭為人清修剛勁似道歸天台葬母過新昌燭獨不見之後以元老入相位值國勢危亡之際天下所屬望也而卒與宜中不協而去云

章鑑字公秉分寧人以別院省試及第累官中書舍人侍左郎官崇政殿說書進簽書樞密院事兼權參知政事遷同知樞密院事咸淳十年王燭拜左丞相鑑拜右

丞相並兼樞密使明年元兵逼臨安鑑託故徑去遣使
亟召還朝既至罷相予祠殿帥韓震之死鑑與曾淵子
明震無他至是御史王應麟繳其錄黃謂震有逆謀鑑
與淵子曲庇之坐是削一官放歸田里後有告鑑家匿
寶璽者霜晨鑑方擁敗衾卧兵士至大索其室惟敝篋
貯一玉杯餘無一物人頗嘆其清約鑑在朝日號寬厚
然與人多許可士大夫目為滿朝歡云

陳宜中字與權永嘉人也少甚貧而性特俊拔有賈人

推其生時以為當大貴以女妻之既入太學有文譽寶祐中丁大全以戚里婢壻事權倖盧允升董宋臣因得寵於理宗擢為殿中侍御史在臺橫甚宜中與黃鏞劉黻林則祖陳宗曾唯六人上書攻之大全怒使監察御史吳衍劾宜中削其籍拘管他州司業率十二齋生冠帶送之橋門之外由是士論翕然稱之號為六君子

按

辛雜識載宜中等六人以甲辰歲史嵩之起復上書時人號為六君子與宋史本傳異附識

宜中謫

建昌軍大全既竄丞相吳潛奏還之賈似道入相復為

之請有詔六人皆免省試令赴景定三年廷試而宜中
中第二人六人中宜中尤達時務由紹興府推官數年
遷監察御史程元鳳再相似道恐其侵權欲去之宜中
首劾元鳳縱丁大全肆惡基宗社之禍命格除太府卿
宜中亦自請外為江東提舉茶鹽常平公事咸淳四年
改浙西提刑五年召為崇政殿說書累遷禮部侍郎兼
中書舍人七年閔闕帥以華文閣待制知福州在官得
民心歲餘入為刑部尚書十年拜簽書樞密院事兼權

參知政事德祐元年升同知樞密院事二月似道喪師
蕪湖乃以宜中知樞密院兼參知政事已而翁應龍自
軍中歸宜中問似道所在應龍以不知對宜中以為似
道已死即上疏乞正似道誤國之罪似道行時以所親
信韓震總禁兵人有言震欲以兵劫遷者宜中召震計
事伏壯士袖鐵椎擊殺之以示不黨於似道

按癸辛雜識載德祐

元年正月似道出師臨行與殿帥韓震京尹曾淵子約
曰或江上師有蹉跌即邀車駕航海且留二子於震家
及師潰魯巷口似道以蠟書趣韓宜中本為似道所引
至是一反賈政召震會議差天府增級顧信等數人擬

之及至擊殺之後北軍入宜
中乃挾二王航海去附識

時右丞相章鑑宵遁曾淵

子等請命宜中攝丞相事詔以王燾為左丞相拜宜中
特進右丞相四月燾還朝論事即與宜中不合臺臣孫
嶸叟請竄籍潛說友吳益李珣宜中以為簿錄非威世
事祖宗忠厚未嘗輕用之珣方召入朝遽加重刑恐後
無以示信燾力爭以為當如嶸叟議會留夢炎自湖南
入朝燾與宜中俱乞罷政請以夢炎為相太皇太后乃
以宜中為左丞相夢炎為右丞相燾進平章軍國重事

燭拜命即日就民居以丞相府讓宜中宜中上疏以爲
一辭一受何以解天下之譏亦去遣使數輩遮留之始
至時命張世傑等四道進師二丞相都督軍馬而不出
督燭請以一丞相建閫吳門以護諸將不然則已請行
宜中媿始與夢炎上疏乞行邊事下公卿議不決七月
世傑等兵果敗於焦山燭奏言事無重於兵今二相並
建都督廟算指授臣不得而知此者六月出師諸將無
統臣豈不知吳門距京不遠而必為此請者蓋大敵在

境非陛下自將則大臣聞督今世傑以諸將心力不一而敗不知國家尚堪幾敗邪臣既不得其職又不得其言之罷免不允燭子乃嗾京學生伏闕上書數宜中過失數十事其畧以為趙潛趙與鑑皆棄城遁宜中乃借使過之說以報私恩令狐槩潛說友皆以城降乃受其包苴而為之羽翼文天祥率兵勤王信讒而沮撓之似道喪師誤國陽請致罰而陰祐之敵兵薄國門勤王師乃留之京城而不遣宰相當出督而畏縮猶豫第令集

議而不行呂師夔狼子野心而使之通好乞盟張世傑
步兵而用之於水劉師勇水兵而用之於步指授失宜
因以敗事臣恐誤國將不止於一似道也書上宜中竟
去遣使召之不至其後罷熈命臨安府捕逮京學生召
之亦不至太皇太后自為書遺其母楊使勉諭之宜中
始乞以祠官入侍乃拜醴泉觀使十月壬寅始造朝尋
為右丞相然事已去矣宜中倉皇發京城民為兵民年
十五以上者皆籍之人皆以為笑十一月遣張全合尹

王麻士龍兵援常州王與士龍皆戰死全不發一矢奔還文天祥請誅全宜中釋不問已而常州破兵薄獨松關鄰邑望風皆遁宜中遣使如軍中請和不得即率羣臣入宮請遷都太皇太后不可宜中痛哭請之太皇太后乃命裝俟升車給百官路費銀及暮宜中不入太皇太后怒曰吾初不欲遷而大臣數以為請顧欺我邪脫簪珥擲之地遂閉閣羣臣求內引皆不納蓋宜中實以明日遷倉卒奏陳失審耳宜中初與元丞相已延期會

軍中既而悔之不果往已延將兵至皋亭山宜中宵遁
陸秀夫奉二王入溫州遺人召宜中宜中至溫州而其
母死張世傑舁其棺舟中遂與俱入閩中益王立復以
為左丞相井澳之敗宜中欲奉王走占城乃先如占城
諭意度事不可為遂不反二王累使召之終不至至元
十九年元軍伐占城宜中走遁後沒於暹宜中為人多
術數少為縣學生其父為吏受贓當黥宜中上書溫守
魏克愚請貸之克愚以為黥吏卒寘之法其後宜中為

浙西提刑克愚郊迎宜中報禮不書銜亦云部下民陳
某克愚皇恐不敢受袖而謝之宜中陽禮之而陰撫其
過無所得其後克愚發賈德生冒借官木事忤似道廢
罷家居宜中入乃極言克愚居鄉不法事似道令章鑑
劾之貶嚴州克愚之死宜中擠之為多

文天祥字宋瑞又字履善吉之吉水人也體貌豐偉美
皙如玉秀眉而長目顧盼炯然自為童子時見學宮所
祠鄉先生歐陽修楊邦乂胡銓像皆謚忠即欣然慕之

曰沒不俎豆其間非夫也年二十舉進士對策集英殿
時理宗在位久政理寢怠天祥以法天不息為對其言
萬餘不為藁一揮而成帝親拔為第一考官王應麟奏
曰是卷古誼若龜鑑忠肝如鐵石臣敢為得人賀尋丁
父憂歸開慶初元兵伐宋宦官董宋臣說帝遷都人莫
敢議非者天祥時入為寧海軍節度判官上書乞斬宋
臣以一人心

伏讀通鑑輯覽

御批南渡僻處臨安形勢已失四明尤瀕海小郡高宗播遷至此
幾不能以自存前車可鑒開慶疆圉日蹙國事更非理宗祇應

博訪盈庭息浮議以勵戰守乃董宋臣忽倡退避之謀何子舉復主固守之策此南宋安危之關鍵而議違議阻皆出自寺人之口可見舉朝皆庸闇懦怯之流無一人實心為國者然
宋室時勢至此已無可為亦不係都之遷與不遷矣 不報即自免

歸後稍遷至刑部郎官宋臣復入為都知天祥又上書極言其罪亦不報出守瑞州改江西提刑遷尚書左侍郎官累為臺臣論罷除軍器監兼權直學士院賈似道稱病乞致仕以要君有詔不允天祥當制語皆諷似道時內制相承皆呈藁天祥不呈藁似道不樂使臺臣張志立劾罷之天祥既數斥援錢若水例致仕時年三十

七咸淳九年起為湖南提刑因見故相江萬里萬里素
奇天祥志節語及國事愀然曰吾老矣觀天時人事當
有變吾閱人多矣世道之責其在君乎君其勉之十年
改知贛州德祐初江上報急詔天下勤王天祥捧詔涕
泣使陳繼周發郡中豪傑并結溪峒蠻使方興召吉州
兵諸豪傑皆應有衆萬人事聞以江西提刑安撫使召
入衛其友止之曰今敵兵三道鼓行破郊畿薄內地君
以烏合萬餘赴之是何異驅羣羊而搏猛虎天祥曰吾

亦知其然也第國家養育臣庶三百餘年一旦有急徵天下兵無一人一騎入關者吾深恨於此故不自量力而以身徇之庶天下忠臣義士將有聞風而起者義勝者謀立人衆者功濟如此則社稷猶可保也天祥性豪華平生自奉甚厚至是盡以家貲為軍費每與賓佐語及時事輒流涕撫几言曰樂人之樂者憂人之憂食人之食者死人之事八月天祥提兵至臨安除知平江府時以丞相陳宜中未還朝不遣十月宜中至始遣之朝

議方擢呂師孟為兵部尚書封呂文德和義郡王

伏讀通鑑

輯覽

御批呂文煥喪師負國反面事敵不加以門誅已屬寬典况危急之際懷去就者正多尤當明誅賞以就激勵乃於叛臣族屬不惟不申刑憲轉重其褒崇將何以驚亂賊之心而作忠義之氣且文煥既已降元不復繫情故國又豈區區王爵足以動其心者宋廷舉措若此所見何異孩稚

欲賴以求好師

孟益偃蹇自肆天祥陛辭上疏言朝廷姑息牽制之意多奮發剛斷之義少乞斬師孟戮鼓以作將士之氣且言宋僖五季之亂削藩鎮建郡邑一時雖足以矯尾大之弊然國亦以寢弱故敵至一州則破一州至一縣則

破一縣中原陸沈痛悔何及今宜分天下為四鎮建都
督統御於其中以廣西益湖南而建閫於長沙以廣東
益江西而建閫於隆興以福建益江東而建閫於番陽
以淮西益淮東而建閫於揚州責長沙取鄂隆興取蘄
黃番陽取江東揚州取兩淮使其地大力衆足以抗敵
約日齊奮有進無退日夜以圖之彼備多力分疲於奔
命而吾民之豪傑者又伺間出於其中如此則敵不難
却也時議以天祥論濶遠書奏不報十月天祥入平江

元兵已發金陵入常州矣天祥遣其將朱華尹玉麻士龍與張全援常至虞橋士龍戰死朱華以廣軍戰五牧敗績玉軍亦敗爭渡水挽全軍舟全軍斷其指皆溺死玉以殘兵五百人夜戰比旦皆沒全不發一矢走歸元兵破常州入獨松關宜中夢炎召天祥棄平江守餘杭明年正月除知臨安府未幾宋降宜中世傑皆去仍除天祥樞密使尋除右丞相兼樞密使如軍中請和與大元丞相巴陵抗論臯亭山丞相怒拘之偕左丞相吳堅

右丞相賈餘慶知樞密院事謝堂簽書樞密院事家鉉
翁同樞密院事劉昺北至鎮江天祥與其客杜訢十二
人夜亡入真州苗再成出迎喜且泣曰兩淮兵足以興
復特二閫小隙不能合從耳天祥問計將安出再成曰
今先約淮西兵趨建康彼必悉力以扞吾西兵指揮東
諸將以通泰兵攻灣頭以高郵寶應淮安兵攻楊子橋
以揚兵攻瓜步吾以舟師直擣鎮江同日大舉灣頭楊
子橋皆沿江脆兵且日夜望吾師之至攻之即下合攻

爪步之三面吾自江中一面薄之雖有智者不能為之謀矣爪步既舉以東兵入京口西兵入金陵要浙歸路其大帥可坐致也天祥大稱善即以書遺二制置遣使四出約結天祥未至時揚有脫歸兵言密遣一丞相入真州說降矣庭芝信之以為天祥來說降也使再成亟殺之再成不忍給天祥出相城壘以制司文示之閉之門外久之復遣二路分覘天祥果說降者即殺之二路分與天祥語見其忠義亦不忍殺以兵二十人道之揚

四鼓抵城下聞候門者談制置司下令備文丞相甚急
衆相顧吐舌乃東入海道遇兵伏環堵中得免然亦饑
莫能起從樵者乞得餘糝羹行入板橋兵又至衆走伏
叢篠中兵入索之執杜許金應而去虞候張慶矢中目
身被二創天祥偶不見獲許應解所懷金與卒獲免募
二樵者以簣荷天祥至高郵汎海至温州聞益王未立
乃上表勸進以觀文殿學士侍讀召至福拜右丞相尋
與宜中等議不合七月乃以同都督出江西遂行收兵

入汀州十月遣參謀趙時賞諮議趙孟滌將一軍取寧都參贊吳浚將一軍取雩都劉洙蕭明哲陳子敬皆自江西起兵來會鄒鳳以招諭副使聚兵寧都元兵攻之鳳兵敗同起事者劉欽鞠華叔顏斯立顏起巖皆死武岡教授羅開禮起兵復永豐縣已而兵敗被執死於獄天祥聞開禮死製服哭之哀至元十四年正月元兵入汀州天祥遂移漳州乞入衛時賞孟滌亦提兵歸獨浚兵不至未幾浚降來說天祥天祥縛浚縊殺之四月入

梅州都統王福錢漢英跋扈斬以徇五月出江西入會
昌六月入興國縣七月遣參謀張汴監軍趙時賞趙孟
滌等盛兵薄贛城鄒淵以贛諸縣兵擣永豐其副黎貴
達以吉諸縣兵攻泰和吉八縣復其半惟贛不下臨洪
諸郡皆送款潭趙璫張虎張唐熊桂劉斗元吳希爽陳
子全王夢應起兵邵永間復數縣撫州何時等皆起兵
應天祥分寧武寧建昌三縣豪傑皆遣人如軍中受約
束元江西宣慰使李恒遣兵援贛州而自將兵攻天祥

於興國天祥不意恒兵猝至乃引兵走即鄧鳳于永豐
鳳兵先潰恒窮追天祥方石嶺鞏信拒戰箭被體死之
至空坑軍士皆潰天祥妻妾子女皆見執時賞坐肩輿
後兵問謂誰時賞曰我姓文衆以為天祥禽之而歸天
祥以此得逸去孫臬彭震龍張汴死於兵繆朝宗自縊
死吳文煥林棟劉洙皆被執歸隆興時賞奮罵不屈有
係累至者輒麾去云小小簽廳官耳執此何為由是得
脫者甚衆臨刑洙頗自辯時賞叱曰死耳何必然於是

棟文炳蕭敬夫蕭燾夫皆不免天祥收殘兵奔循州駐南嶺黎貴達潛謀降執而殺之至元十五年三月進屯麗江浦六月入船澳益王昀衛王繼立天祥上表自劾乞入朝不許八月加天祥少保信國公軍中疫且起兵士死者數百人天祥惟一子與其母皆死十一月進屯潮陽縣潮州盜陳懿劉興數叛附為潮人害天祥攻走懿執興誅之十二月趨南嶺鄒淵劉子俊又自江西起兵來再攻懿黨懿乃潛遁元帥張弘範兵濟潮陽天祥

方飯五坡嶺張弘範兵突至衆不及戰皆頓首伏草莽
天祥倉皇出走千戶王惟義前執之天祥吞腦子不死
鄒淵自剄衆扶入南嶺死官屬士卒得脫空坑者至是
劉子俊陳龍復蕭明哲蕭資皆死杜潁被執以憂死惟
趙孟滌遁張唐熊桂吳希奭陳子全兵敗被執俱死焉
唐廣漢張栻後也天祥至潮陽見弘範左右命之拜不
拜弘範遂以客禮見之與俱入厓山使為書招張世傑
天祥曰吾不能扞父母乃教人叛父母可乎索之固乃

書所過零丁洋詩與之其末有云人生自古誰無死留
取丹心照汗青弘範笑而置之厓山破軍中置酒大會
弘範曰國亡丞相忠孝盡矣能改心以事宋者事皇上
將不失為宰相也天祥泣然出涕曰國亡不能救為人
臣者死有餘罪況敢逃其死而二其心乎弘範義之遣
使護送天祥至京師天祥在道不食八日不死即復食
至燕館人供張甚盛天祥不寢處坐達旦遂移兵馬司
設卒以守之時元世祖多求才南官王績翁言南人無

如天祥者遂遣續翁諭旨天祥曰國亡吾分一死耳儻
緣寬假得以黃冠歸故鄉他日以方外備顧問可也若
遽官之非直亡國之大夫不可與圖存舉其平生而盡
棄之將焉用我續翁欲合宋官謝昌元等十人請釋天
祥為道士留夢炎不可曰天祥出復號召江南置吾十
人於何地事遂已天祥在燕凡三年世祖知天祥終不
屈與宰相議釋之有以天祥起兵江西事為言者不果
釋至元十九年有閩僧言土星犯帝坐疑有變未幾中

山有狂人自稱宋主有兵千人欲取文丞相京城亦有
匿名書言其曰燒蕞城葦率兩翼兵為文丞相可無憂
者時盜新殺左丞相阿哈瑪特命撤城葦遷瀛國公及
宋宗室開平疑丞相者天祥也召入諭之曰汝何願天
祥對曰天祥受宋恩為宰相安事二姓願賜之一死足
矣然猶不忍遽麾之退言者力贊從天祥之請從之俄
有詔使止之天祥死矣天祥臨刑殊從容謂吏卒曰吾
事畢矣南鄉拜而死數日其妻歐陽氏收其屍面如生

年四十七其衣帶中有贊曰孔曰成仁孟曰取義惟其義盡所以仁至讀聖賢書所學何事而今而後庶幾無媿

欽定續通志卷四百九

欽定四庫全書

欽定續通志卷四百十

列傳

宋一百十四

宣繒

薛極

陳貴誼

曾從龍

鄭性之

余天錫

許應龍

林略

徐榮叟

劉伯正

李性傳

陳韡

崔福

宣繒慶元府人嘉泰三年太學兩優釋褐歷官以太學
博士召試為秘書省校書郎升著作佐郎兼權考功郎
官知吉州福建提點刑獄遷考功員外郎又遷秘書少
監守起居舍人為起居郎編孝宗實訓試吏部侍郎權
兵部尚書嘉定十四年同知樞密院事兼叅知政事明
年拜叅知政事以資政殿學士奉祠端平三年召赴闕
升大學士提舉洞霄宮以觀文殿大學士致仕卒贈少
師詔繒嘗預定策以王堯臣故事贈太師謚忠靖

薛極字曾之常州武進人以父任調上元主簿中詞科
為大理評事通判温州知廣德軍以叅知政事樓鑰薦
遷大理正刑部郎官司封郎中權右司郎中遷右司郎
中拜司農卿兼權兵部侍郎尋為真嘉定八年疏奏願
陛下深思顧諟之難益懷兢業之念勿謂帝德罔愆而
怠於進修勿以天災代有而應不以實政綱雖舉必求
益其所未至德澤雖布必思及其所未周誓以今日遇
災警懼之心永為異時暇逸之戒遷權刑部尚書尋試

戶部尚書兼權吏部尚書遂為真十五年特賜同進士

出身拜端明殿學士簽書樞密院事紹定元年拜叅知

政事兼同知樞密院事尋知樞密院事兼叅知政事封

毗陵郡公以觀文殿大學士知紹興府

按宋史宰輔表
理宗紹定元年

六月戊申薛極自叅知政事除同知樞密院事十二月
辛亥薛極進知樞密院事兼叅知政事六年十月丁亥
薛極自金紫光祿大夫知樞密院事進樞密使十二月
庚辰薛極以觀文殿大學士知紹興府本傳終極進樞
密使
不載兼浙東安撫使端平元年加少保和國公致仕卒

陳貴誼字正甫福州福清人慶元五年進士授瑞州觀

察推官中博學宏詞科授江南東路安撫司機宜文字
遷太社令再遷太學博士時議更楮幣法貴誼轉對言
人主令行禁止者以同民之所好惡楮券之令反使姦
惡獲逞道路咨怨非所以祈天永命固結人心因援熙
寧新法為辭又言明銳果敢之才足以集事而失於剽
輕老成寬博之士足以厚俗而失於循理孰若舉之以
衆取之以公主更幣之法者乃摘新法等語激怒時相
且謂貴誼引類植黨人為危之遷太常博士以兄貴謙

兼禮部郎官引嫌遷將作監丞兼魏惠憲王府小學教授轉對謂言路雖開觸犯忌諱者指為好名切劘時政者指為玩令利害關於天下是非公於人心一人言之未已或至累十數人言之則又指為朋黨是非易位忠佞不分史彌遠益不樂遷秘書郎出知江陰軍提舉江西常平召赴行在未至授禮部郎官屬金人加兵淮蜀貴誼言人才所以立國今旁蹊曲徑倖門四闢言路所以通下情令嬖阿循默囊括不言民力已竭而科歛之

外餽遺以謀進者未已軍中恥言敗北陣亡者不恤恥
言棄潰逃竄者復招又言婉順巽從者是災疾也非愛
我也宜屏之外之矯拂救正者是藥石也愛我也宜用
之聽之彌遠滋不樂諷言者論罷主管崇禧觀起知徽
州召授司封郎官兼翰林權直兼玉牒所檢討會有事
明堂章首引包拯皇祐中乞因肆赦除聚斂培克之弊
當察州縣府庫致羨之由做成周邦饗必及死王事者
之子與漢置羽林孤兒專取從軍死事之後教以五兵

理宗即位以為宗正少卿兼侍講兼權直學士院尋遷起居舍人寶慶初詔舉賢能才識之士貴誼乃言曰世以容嘿滯固為賢以苛刻生事為能以褊狹趣辦為才以輕疏嘗試為識及茲初政當求忠實正直奉公愛民知禮義廉恥而不越防範者以充中外之選又言成王之初元臣故老警以無逸者欲其克壽勉以敬德者欲其永命期以豈弟者欲其受命之長則可謂愛君切而慮患深矣遷中書舍人升兼直學士院內侍濫受恩賞

輒封還詔書將郊貴誼以民生實艱吏員尚衆征斂幾
於奪取公費掩為私藏宜大明黜陟庶有以見帝於郊
遷禮部侍郎仍兼中書舍人權刑部尚書升修玉牒官
兼侍讀為禮部尚書兼給事中端明殿學士簽書樞密
院事紹定六年冬帝始親政進叅知政事帝面諭之曰
頃聞憂國之言朕所不忘兼同知樞密院事出師汴洛
時貴誼已移疾猶上疏力爭五上章乞歸轉四官加邑
封致仕卒贈少保資政殿大學士

曾從龍字君錫左僕射公亮四世從孫初名一龍慶元五年擢進士第一始賜令名授簽書奉國軍節度判官廳公事遷兵部員外郎左司郎中起居舍人兼太子右諭德使金還轉官疏言州郡累月闕守而以次官權攝者彼惟其攝事也自知非久何暇盡心於民事獄訟淹延政令玩弛舉一郡之事付之胥吏幸而除授一人民望其至如渴望飲足未及境而復以他故罷去矣且每易一守供張借請少不下萬緡郡帑所入歲有常數而

頻年將迎所費不可勝計然則輕於易置公私俱受其
病欲望明詔二三大臣郡守有闕即時進擬其有求避
憚行者悉杜絕其請其繳劾彈拄者疾速行之蓋郡計
寬則民力裕利害常相關故也開禧間勾外知信州戍
卒行掠境內從龍置於法索得婦人衣命集於市召權
禮部侍郎兼中書舍人兼太子左諭德繳還張鉉復官
詞頭以鉉抑令姪女竭資財結姻蘇師旦之子故也為
吏部侍郎仍兼職權刑部尚書嘉定六年秋陰雨乞放

繫因進對言修德政蓄人材飭邊備帝善其言七年知貢舉疏奏國家以科目網羅天下之英雋義以觀其通經賦以觀其博古論以觀其識策以觀其才異時謀王斷國皆繇此其選比來循習成風文氣不振學不務根柢辭不尚體要涉獵未精議論疏陋綴緝雖繁氣象萎繭願下臣此章風厲中外澄源正本莫甚於斯詔從之進端明殿學士簽書樞密院太子賓客改叅知政事疾胡榘愴壬排沮正論陳其奸罪榘嗾言者劾罷以前職

提舉洞霄宮起知建寧府丁內艱服除為湖南安撫使
撫安峒獠威惠並行興學養士湘人紀之石改知隆興
府復提舉洞霄宮改萬壽觀兼侍讀奉朝請端平元年
授資政殿大學士沿江制置使兼知建康府兼行宮留
守拜叅知政事兼同知樞密院事時有三京之役極論
南兵輕進易退未幾言驗進知樞密院事兼叅知政事
以樞密院使督視江淮荆襄軍馬疏言邊面遼遠聲援
不接請並建二閫詔許之專畀江淮以荆襄屬魏了翁

朝論邊用不給詔從龍了翁并領督府及從龍卒贈少師弟用虎天麟治鳳皆歷顯任

鄭性之字信之初名自誠福州人嘉定四年進士第一
歷官知贛州改知隆興府後以寶章閣待制提舉玉隆
萬壽宮進華文閣待制提舉上清太平宮進敷文閣待
制知建寧府端平元年召為吏部侍郎入對言陛下大
開言路以通壅蔽心苟愛君誰不欲言言不切直何能
感動譬如積水久壅一決其勢必盛其聲必激故言者

多則易於取厭、言之激則難於樂受、若少有厭倦、動於
詞色、則讒諂乘間、或不自知矣。又言願陛下明詔百辟、
滌去舊污、一以清白相師、權之所在、勢所必趨、恐懼戒
謹、尤防以微、以保終譽、毋招謗議、則朝綱肅而國體尊
矣。又曰、為君者不以堯舜自期、則無善治、告君者不陳
堯舜之道、則無遠猷、擢左諫議大夫、言臺臣交章互詆、
願陛下監古今天下安危之變、君子小人消長之機、公
以處之、迺得其當、況夫聽言之道、宜以事觀、若言果有

關國體有補治道有益主德則言之過激夫亦何傷彼雖米名我實有益惟虚心納善若決江河則激者自平矣拜端明殿學士簽書樞密院事進同知樞密院事兼權叅知政事尋拜叅知政事兼同知樞密院事尋知樞密院事兼叅知政事加觀文殿學士致仕寶祐二年卒

按宋史此下有李鳴復鄒應龍二傳無事蹟足錄今從刪

余天錫字純父慶元府昌國人丞相史彌遠延為弟子師性謹愿絕不預外事彌遠器重之是時彌遠在相位

久皇子竝深惡之念欲有廢置會沂王宮無後丞相欲
借是陰立為後備天錫秋告歸試於鄉彌遠曰今沂王
無後宗子賢厚者幸具以來天錫渡江與越僧同舟舟
抵西門天大雨僧言門左有全保長者可避雨如其言
過之保長知為丞相館客具鷄黍甚肅須臾有二子侍
立全曰此吾外孫也日者嘗言二兒後極貴問其姓長
曰趙興莒次曰與芮天錫憶彌遠所屬其行亦良是告
於彌遠命二子來保長大喜鬻田治衣冠心以為沂邸

後可冀也集姍黨且詫其遇以行天錫引見彌遠善相
大奇之計事泄不便遽復使歸保長大慚其鄉人亦竊
笑之逾年彌遠忽謂天錫曰二子可復來乎保長謝不
遣彌遠密諭曰二子長最貴宜撫於父家遂載與歸天
錫母朱為沐浴教字禮度益閑習未幾召入嗣沂王迄
即帝位是為理宗天錫嘉定十六年舉進士歷監慈利
縣稅籍田令超授起居舍人遷權吏部侍郎兼玉牒所
檢討官兼崇政殿說書遷戶部侍郎兼知臨安府浙西

安撫使試戶部侍郎權戶部尚書皆兼知臨安府升兼
詳定勅令官以寶文閣學士知婺州仍舊職奉祠起知
寧國府進華文閣學士知福州召為吏部尚書兼給事
中兼侍讀疏奏臣荷國恩起家分閫旋蒙趣覲躋玷邇
聯時權禮部侍郎曹邕實在諫省益嘗抗疏謂用臣大
驟臣與邕交最久相知最深今觀其所論於君父有陳
善之敬友朋有責善之道而邕遂遷官臣竟汙要路邕
以不得其言累疏乞去夫亟用舊人而遂退亡莊士則

將謂之何哉。幽老成之望，直諒多益，置之近班，可以正
乃辟，可以儀有位，欲望委曲留行使之，釋然無疑，安於
就職，則陛下既昭好賢之美，而微臣亦免妨賢之媿。帝
從之。嘉熙二年，拜端明殿學士，同簽書樞密院事。尋拜
叅知政事，兼同知樞密院事。封奉化郡公，授資政殿學
士，知紹興府、浙東安撫使，以觀文殿學士致仕。朱氏亦
封周楚國夫人。壽過九十，將以生日拜天錫為相，而天
錫卒，贈少師，尋加太師，謚忠惠。弟天任為兵部尚書，兄

弟友愛方貧時率更衣以出終歲同衾從子晦厯官尚書出帥全蜀常置義莊以贍宗族然在蜀以違言論知閬州王惟忠死士論少之

許應龍字恭甫福州閩縣人五歲通經旨坐客曰小兒氣食牛應龍應聲丈夫才吐鳳為對四坐嘉歎入太學嘉定元年舉進士調汀州教授差浙東宣撫司掾差戶部架閣遷籍田令太學博士時李全時青輩歸附應龍入對有莽蜂是懲養虎貽患之說後皆如所言遷國子

博士國子丞宗學博士理宗即位應龍首陳正心為治
國平天下之綱領遷秘書郎兼權尚左郎官遷著作郎
勾外知潮州盜陳三槍起贛州出沒江閩廣間勢熾甚
而盜鍾全相挺為亂樞密陳韓帥江西任招捕三路調
軍分道追勦盜逼境上應龍亟調水軍禁卒土兵弓級
分扼要害明間牒守關隘斷橋開塹斬木塞涂點集民
兵激勸隅總諭以保鄉井守室廬全妻子蒐補親兵日
加訓閱既而橫岡桂嶼相繼以捷聞招捕司遣統領官

齊敏率師由漳趨潮截賴寇餘黨應龍諭敏曰兵法攻瑕今鍾寇將窮陳寇倡倨若先破鍾則陳不戰禽矣敏惟命於是諸寇皆平方未解嚴時有行旅數人隅總搜其橐中金銀指為賊黨應龍辨其非盜釋之皆羅拜感泣始人疑應龍儒者不閑戎事及見其區畫事宜分別齊民靜練雍容莫不歎服僚屬請上功應龍曰守職捍城保民何功之云距州六七十里曰山斜峒僚所聚勾耕土田不輸賦禁兵與閑應龍平決之其首感悅率父

老鳴岳擊筇踴躍詣郡謝去之日闔郡遮道攀送端平
初召為禮部郎官入對帝謂應龍曰卿治潮有聲與李
宗勉治台齊名應龍頓首曰民無不可化顧牧民者如
何耳臣治州幸免曠瘼皆陛下德化所暨臣非曰能之
兼榮文恭王府教授力辭遷國子司業祭酒徐僑議學
校差職欲先譽望應龍以為不若差以資格資格一定
則僥倖之門杜而造請之風息僑以為然時有憑勢干
職者力却之遷國子祭酒攝侍右侍郎兼學士院權直

是日罷鄭清之喬行簡制應龍所草也翼日文德殿宣
布畢帝遣中使召應龍諭之曰草制甚善應龍復謝曰
臣聞昔人有言進人若將加諸膝退人若將墜諸淵今
二相乞罷機政與陛下體貌大臣之意兩盡其美可也
帝善之就令草勅書戒諭諸閫權吏部侍郎兼侍講兼
權直學士院試吏部侍郎升侍讀權兵部尚書時楮幣
虧甚行簡主行楮提之說州縣希旨奉承貧富猜懼應
龍奏從民便節用二說行簡然之兼吏部尚書遷兵部

兼中書舍人三上章乞外不允兼給事中兼吏部尚書
請外詔免兼中書拜端明殿學士簽書樞密院事累辭
會正言郭磊卿有論疏以端明殿學士提舉洞霄宮卒
年八十有一贈資政殿學士銀青光祿大夫應龍不躁
不競不激不隨不妄薦士而亦無傷人害物之事潮州
之治最可紀也

林略字孔英温州永嘉人慶元五年舉進士歷饒州大
寧監教授辟幹辦四川茶馬司公事崔與之帥蜀目之

曰此臺閣之端也薦之遷武學博士國子監丞太常寺
丞奉祠拜宗正少卿兼崇政殿說書遷右司諫尋遷左
司諫兼侍講告於帝曰虛心以為從諫之本從諫以為
永治之本拜殿中侍御史升侍御史試右諫議大夫嘉
熙三年以端明殿學士同簽書樞密院事以言罷提舉
洞霄宮以資政殿學士致仕淳祐三年卒特贈宣奉大
夫

徐榮叟字茂翁煥章閣學士應龍之子嘉定七年舉進

士歷官通判臨安府遷太學博士兼崇政殿說書遷秘書郎升著作佐郎兼侍左郎官出為江東提點刑獄直秘閣知婺州遷著作郎兼禮部郎官以集英殿修撰知靜江府兼廣西經略安撫使召為行在司諫復兼說書兼侍講嘉熙四年拜右諫議大夫入對言自楮幣不通物價倍長而民始怨自米運多阻粒食孔艱而民益怨此見之京師者然也外而郡邑苛政橫斂無所不有嚴刑峻罰靡所不施和糴則科抑以取贏軍需則並緣而

規利逃亡強令代納蠲放忍至重催犯私販者不問多寡槩遭黥徒逋官課者不恤有無動輒監繫囹圄充斥率是干連詞訟追呼莫非枝蔓如此則民安得而不怨甚者富家巨室武斷鄉閭貴族豪宗侵牟民庶茹冤者不敢告負抑者不得伸怨氣薰蒸天示之應此亢陽之所以為沴也遷權禮部尚書兼權吏部尚書拜端明殿學士簽書樞密院事淳祐二年乞歸田里以資政殿大學士提舉洞霄宮六年轉一官致仕卒

按宋史此下有別之傑傳無事

金史卷一百一十二
蹟足錄

今從刪

劉伯正字直卿饒州餘干人父簡為丞相趙汝愚客伯
正以開禧元年舉進士調太平主簿通判棗陽軍辟荆
湖制置司機宜兩浙轉運司主管公事厯軍器將作太
府三監主簿樞密院編修官兵部郎官監察御史有事
於明堂雷電忽至執事者鮮不離次伯正立殿下伸笏
儼然聲色不動帝遂以大任期之遷左司諫疏言兵籍
寢廣糧餉益艱請預備軍食又言銓選財計刑獄之積

樊乞以願治之心而急董正治官之圖以勤政之思而申嚴察計吏之法又言所憂非一而急務之當慮者有三曰申飭邊備區處流民隄防姦盜帝皆善其言升右正言以華文閣待制知廣州兼廣東經略安撫使改轉運使以寶章閣直學士知太平州召為禮部侍郎兼中書舍人遷吏部侍郎權刑部尚書淳祐四年拜端明殿學士簽書樞密院事兼權叅知政事真拜叅知政事以監察御史孫起予言罷授資政殿學士提舉洞霄宮監

察御史蔡次傳言之降一官尋復舊官致仕卒贈正奉大夫加少保時論謂伯正立朝以靜重鎮浮不求名譽

善藏其用云

按宋史此下有金淵傳無事蹟足錄今從刪

李性傳字成之宗正寺主簿舜臣之子也嘉定四年舉進士歷幹辦行在諸軍審計事進對有崇尚道學之名未遇其實帝曰實者何在性傳對曰在陛下格物致知以為出治之本遷武學博士尋為太常博士升太常寺丞兼權工部郎中兼權都官郎官遷起居舍人疏言東

周以後諸侯卿大夫皆以既葬而除服秦漢之際尤為
淺促孝文定為三十六日之制則視孝惠以前已有加
矣東漢以後又損之為二十七日謂之以日易月則薄
之至也千數百年惟晉武帝魏孝文為能復古之制而
羣臣沮格未克盡行惟孝宗通喪三年近古所獨陛下
繼之至性克盡前烈有光乞以此疏付之史官庶幾四
海聞風民德歸厚遷起居郎權刑部侍郎進禮部侍郎
以臣僚言罷尋以寶章閣待制知饒州改知寧國府再

知饒州復以言罷召為兵部侍郎權兵部尚書吏部尚書臣僚論舜臣立廟封爵事落職提舉太平興國宮淳祐四年權禮部尚書五年拜端明殿學士簽書樞密院事兼權叅知政事尋同知樞密院事未幾落職於郡十二年以資政殿大學士提舉洞霄宮寶祐二年依舊職提舉萬壽觀以觀文殿學士致仕卒特贈少保

陳韡字子華福州侯官人父孔碩為朱熹呂祖謙門人韡讓父郊恩與弟艱登開禧元年進士第從葉適學嘉

定十四年賈涉開淮閫辟京東河北幹官韓謂山東河北遺民宜使歸耕其土給耕牛農具分配以內郡之貸死者然後三分齊地張林李全各處其一其以待有功者河南首領以三兩州來歸者與節度使一州者守其土忠義人盡還北然後括淮甸間田倣韓琦河北義勇法募民為兵給田而薄征之擇土豪統率鹽丁又別廩為一軍此第二重藩籬也十五年淮西告捷韓策金人必專向安豐而分兵綴諸郡使卞整張惠李汝舟范

成進各以其兵屯廬州以待之金將盧鼓搥新勝於潼關乘銳急戰當持久困之不過十日必遁設伏邀擊必可勝又使時青夏金候金人深入以輕兵擣其巢穴第一策也其後金人果侵安豐驛如盱眙犒師改淮東制置司幹辦公事再如盱眙見劉瑋調卞整張惠范成進夏全諸軍應援擣虛皆行驛策遂有堂門之捷俘其四駙馬者遷將作監丞又遷太府寺丞差知真州淮東提點刑獄加直寶章閣依舊提點刑獄兼知寶應州遷宗

正寺丞權工部郎中改倉部員外郎入對言臣所陳夏
周漢唐數君之事如布德兆謀任賢使能信賞必罰區
處藩鎮不事姑息規摹莫大於此又言人主所以御天
下者賞罰而已紹定二年冬盜起閩中帥王居安屬韡
提舉四隅保甲韡有親喪辭之轉運使陳汶提舉常平
史彌忠告急於朝謂非韡莫可平明年以寶章閣直學
士起復知南劍州提舉汀州邵武軍兵甲公事福建路
兵馬鈐轄同共措置招捕盜賊兼福建路招捕使未幾

加提點刑獄鞞籍土民丁壯為一軍沙縣紫雲基告急
沙縣破賊由間道趨城忠勇軍破之於高橋賊乃趨邵
武勢益熾時有議當招不當捕者鞞言始者賊僅百計
招而不捕養之至千又養之至萬今復養之將至於無
算求淮西兵五千人可圖萬全詔鞞兼福建路招捕使
賊急攻汀州淮西帥曾式中調精兵三千五百人由泉
漳間道入汀擊賊於順昌勝之六月兵大合加福建提
點刑獄七月鞞親提兵至沙縣順昌將樂清流宣化督

捕所至克捷九月分兵進討十月進攻五賊營砦平之
十一月破潭瓦礫賊起之地夷其巢穴十二月誅汀州
叛卒諭降連城七十有二砦汀境皆平四年正月遣將
破下瞿張原砦二月躬往邵武督捕餘寇賊首晏彪迎
降韡以其力屈乃降卒誅之進右文殿修撰依舊提點
刑獄招捕使兼知建寧府衢州寇汪徐來二破常山開
化勢張甚韡命淮將李大聲提兵七百出賊不意夜薄
其砦賊出迎戰見算子旗驚曰此陳招捕軍也皆大哭

急擊之衝寇悉平六年進寶章閣待制知隆興府贛寇
陳三槍據松梓山砦出沒江西廣東所至屠殘韓遣官
吏諭降賊輒殺之乃謂盜賊起於貪吏劾其尤者二人
又謂寇盜稽誅以臣下欺誕事權渙散所致若決計蕩
除數月可畢十一月詔節制江西廣東福建三路捕寇
軍馬韓奏遣將劉師直扼海州齊敏扼循州自提淮西
兵及親兵擣賊巢穴十二月兼知贛州端平元年正月
進華文閣待制江西安撫使二月至贛斬將士張皇賊

勢及掠子女貨財者齊敏李大聲所至克捷三月分兵
守大石堡截賊粮道遂破松梓山三槍與餘黨縋崖而
遁韞親督諸將乘春瘴未生薄松梓山賊悉精銳下山
迎敵旗幟服色甚盛韞軍步騎夾擊又縱火焚之士皆
攀崖上賊巢蕩為煙埃賊首張魔王自焚斬千五百級
禽賊將十二得所掠婦女牛馬及僭偽服物各數百計
三槍中箭與敏軍遇擊敗之賊遁翼日追及下黃又敗
之餘衆尚千餘雉獮略盡三槍僅以數十人遁至興寧

就禽檻車載三槍等六人斬隆興寺初賊跨三路數州六十砦至是悉平詔稱韓忠勤體國計慮精密進權工部侍郎仍知隆興兼江西安撫使未幾為工部侍郎改江東安撫使知建康府兼行宮留守二年入奏事帝稱其平寇功韓頓首言曰臣不佞徒有孤忠仗陛下威靈苟逃曠敗耳何功之有遷權工部尚書又權刑部尚書沿江制置大使依舊江東安撫使知建康府往來巡視鄂州江面措置捍禦三年加寶謨閣學士嘉熙元年進

煥章閣學士四年拜刑部尚書辭免加徽猷閣學士知
潭州荆湖南路安撫使淳祐四年召為兵部尚書拜端
明殿學士同簽書樞密院事兼叅知政事尋拜叅知政
事兼同知樞密院事七年知樞密院事湖南安撫大使
兼知潭州九年以觀文殿學士福建安撫大使知福建
五上章辭以舊職提舉洞霄宮開慶元年召赴闕落致
仕充醴泉觀使兼侍讀景定元年授福建安撫大使兼
知福州久之提舉祐神觀力請致仕明年卒年八十有

三贈少師謚忠肅崔福者故羣盜嘗為官軍所捕逸去
因隸軍籍初從趙葵收李全有功名重江淮又累從鞞
捕賊積功至刺史大將軍從後鞞留隆興既而鞞移金
陵而福猶在隆興屬通判與郡僚燕滕王閣福恚其不
見招道遇民愬寃者福携其人直至飲所責以郡官不
理民事麾諸卒盡碎飲具官吏皆喘恐竄去莫敢嬰其
鋒鞞知之遂檄建康署為鈐轄福又奪統制官王明鞍
馬及迫逐總領所監酒官親屬鞞戒諭之不聽會淮兵

有警步帥王鑑出師鑑請福行鞞因厚遣之福不樂為
鑑用遇敵不擊託以美女擅歸亦不聞於制置司鑑怒
遂白其前後過惡請必正其慢令之罪會鞞亦厭忌之
遂坐以軍法然後聲其罪於朝且自劾專殺之罪下詔
獎諭免其罪福勇悍善戰頗著威聲其死也軍中惜之
時論以為良將難得而鞞以私忿殺之然福跋扈之迹
已不可掩殺身之禍亦有以自取之也

欽定續通志卷四百十

欽定四庫全書

史部

欽定續通志卷四百十一

至四

編修_臣謝振定覆勘

總校官原任侍講_臣王燕緒

欽定四庫全書

欽定續通志卷四十一

列傳

宋 一百十五

王伯大

鄭家

應儼

徐清叟

李曾伯

王埜

蔡抗

馬天驥

皮龍榮

沈炎

王伯大字幼學福州人嘉定七年進士歷官主管戶部
架閣遷國子正知臨江軍歲饑賑荒有法遷國子監丞
知信陽軍改知池州兼權江東提舉久之依舊直秘閣
江東提舉常平仍兼知池州端平三年召至闕下遷尚
右郎官尋兼權左司郎官遷右司郎官試將作監兼右
司郎中進直寶謨閣樞密副都承旨兼左司郎中進對
言陛下親政五年于茲盛德大業未能著見于天下而
天下之謗議者籍籍未已夫以陛下之好惡用舍無非

有招至人言之道誠能布所失於天下凡人言所不貸者一朝赫然而盡去之如日月之更如風雷之迅則天下之謗自息矣又極言邊事曲盡事情以直寶謨閣知婺州遷祕書少監拜司農卿復為祕書少監進太常少卿累官至刑部尚書淳祐七年拜端明殿學士簽書樞密院事兼權叅知政事八年拜叅知政事以監察御史陳瑛論罷以資政殿學士知建寧府寶祐元年卒

鄭宋不詳何郡人初歷官為祕書省校書郎遷著作佐

郎兼權侍右郎官升著作郎兼侍講拜右正言言丞相
史嵩之以父憂去遽欲起之意甚厚也奈何謗議未息
事闕名教有尼其行帝答曰卿言雖切事理進退大臣
豈易事也擢殿中侍御史疏言臺諫以糾察官邪為職
國之紀綱係焉比劉漢弼劾奏司農卿謝遼陛下已行
其言矣未及兩月忽復叙用何其速也漢弼雖亡官不
可廢臣非為漢弼惜為朝廷惜又奏劾王瓚龔基先胡
清獻錡秩罷祠皆從之三人者不才臺諫也遷侍御史

疏言比年以來舊章寢廢外而諸閫不問勲勞之有無而爵秩皆得以例遷內而侍從不問才業之優劣而職位皆可以例進執政之歸休田里者與之貼職可也而凡補外者皆授之矣故自公侯以至節度有同序補自書殿以至祕閣錯立周行名器之輕莫此為甚遷左諫議大夫淳祐七年拜端明殿學士同簽書樞密院以監察御史陳求魯論罷淳祐九年卒家之居言路嘗按工部侍郎曹邇主管吏部架閣文字洪芹則大傷公論云

應繇字之道慶元府昌國人刻志于學嘉定十六年試南省第一遂舉進士為臨江軍教授入為國子學錄兼莊文府教授遷太學博士又遷祕書郎請蚤建太子入對帝問星變繇請修實德以答天戒帝問州縣貪風繇曰貪黷由殉色而起成湯制官刑儆有位首及於巫風淫風者有以也帝問藏書繇請訪先儒解經注史因及程迥張根所著書皆有益世教帝善之遷祕書省著作佐郎兼權尚左郎官兼翰林權直又遷著作郎仍兼職

以言罷淳祐二年叙復奉祠遷宗正寺丞兼權禮部郎
官以言罷差知台州召兼禮部郎官遷祕書少監仍兼
職兼權直學士院又遷起居舍人權兵部侍郎時暫兼
權吏部侍郎兼直學士院帝一夕召儼草麻夜四鼓五
制皆就帝奇其才遷吏部侍郎仍兼職進翰林學士兼
中書舍人八年授同知樞密院事兼參知政事九年拜
參知政事封臨海郡侯乞歸田里以資政殿學士知平
江府提舉洞霄宮寶祐三年殿中侍御史丁大全論罷

尋卒德祐元年詔復元職致仕

徐清叟字真翁煥章閣學士應龍之子嘉定七年進士
歷主管戶部架閣遷籍田令疏言邇者江右閩嶠盜賊
竊發監司帥守未免少立威名專行誅戮此特以權濟
事而已而偏州僻壘習熟見聞轉相倣倣亦皆不俟論
報輒行專殺欲望明行禁止一變臣下嗜殺希進之心
以無墜祖宗立國仁厚之意遷軍器監主簿入對言太
后舉哀之日陛下以后服下同媵妾令別置大袖一襲

文思院觀望欲如后飾再造其一以進詔卻之此真知
嫡庶之辨者請宣付史館以垂法後世遷太常博士入
對疏言陛下親政以來精神少振而氣脉未復條目畢
舉而綱紀未張公道若伸而私意之未盡克者則亦風
化之先務勸戒之大權與夫選用之要術猶有闕畧而
未之講明者爾何謂風化之先務曰原人倫以釋羣惑
者是已何謂勸戒之大權曰惜名器以示正義者是已
何謂選用之要術曰因物望而進人才者是已蓋欲請

復皇子竑王爵裁抑史彌遠恤典召用真德秀魏了翁
也兼崇政殿說書遷祕書郎升著作佐郎兼權司封郎
官遷軍器少監皆兼職依舊遷將作監拜殿中侍御史
兼侍講遷太常少卿兼權戶部侍郎兼侍講三疏劾外
給事中洪咨夔起居舍人吳泳皆抗疏留之尋權工部
侍郎以右文殿修撰知泉州集英殿修撰知靜江府廣
西經畧安撫使遷侍右侍郎主管雲臺觀召赴闕遷戶
部侍郎再為侍右侍郎以寶章閣直學士知温州改知

福建安撫使改知婺州以煥章閣直學士差知泉州辭
免改知袁州又改知紹興府兩浙東路安撫使辭免改
知潭州尋知廣州兼廣東經畧安撫使召赴闕權兵部
尚書兼侍讀淳祐九年兼同修國史實錄院同修撰權
吏部尚書遷禮部尚書拜端明殿學士簽書樞密院事
進同知樞密院事封晉寧郡公奏修四朝國史志傳五
上章乞改機政帝不許十二年拜參知政事尋知樞密
院事兼叅知政事監察御史朱應元論罷以資政殿大

學士提舉王隆萬壽宮改洞霄宮復以監察御史朱熠
論罷久之以舊職提舉洞霄宮開慶元年召赴闕以舊
職提舉佑神觀兼侍讀出知泉州復提舉佑神觀景定
三年轉兩官致仕卒贈少師謚忠簡清叟父子兄弟皆
以風節相尚而清叟劾罷袁甫於公論少貶云

李曾伯字長孺覃懷人後居嘉興歷官通判濠州遷軍
器監主簿添差通判鄂州兼沿江制置副使司主管機
宜文字遷度支郎官授左司郎官淮西總領尋遷右司

郎官太府少卿兼左司郎官兼敕令所刪修官遷太府卿淮東制置使兼淮西制置使詔軍事便宜行之曾伯疏奏三事答天心重地勢協人謀又言邊餉貴於廣積將材貴於素儲賞與不可以不精戰士不可以不恤又條上淮面舟師之所當戒湖面險阻之所當治加華文閣待制又加寶章閣直學士進權兵部尚書淳祐六年正月朔日食曾伯應詔歷陳先朝因天象以謹邊備圖帥材乞早易閫寄放歸田里又請修浚泗州西城加煥

章閣學士言者相繼論罷九年以舊職知靜江府廣西
經畧安撫使兼廣西轉運使陳守邊之宜五事進徽猷
閣學士京湖安撫制置使知江陵府兼湖廣總領兼京
湖屯田使進龍圖閣學士疏言襄陽新復之地城池雖
修浚田野未加闢室廬雖草創市井未阜通請蠲租三
年詔從之加端明殿學士兼夔路策應東閣進資政殿
學士制置四川邊面與執政恩例尋授四川宣撫使特
賜同進士出身召赴闕加大學士知福州兼福建安撫

使辭免以大學士提舉洞霄宮起為湖南安撫大使兼知潭州兼節度廣南移治靜江開慶元年進觀文殿學士以諫議大夫沈炎等論罷景定五年起知慶元府兼沿海制置使咸淳元年殿中侍御史陳宗禮論劾褫職德祐元年追復元官曾伯初與賈似道俱為閫帥邊境之事知無不言似道卒嫉之使不竟其用云

王埜字子文寶章閣待制介之子也以父廕補官登嘉定十二年進士第仕潭時帥真德秀一見異之延致幕

下遂執弟子禮德秀欲授以詞學堃曰所以求學者義理之奧也詞科惟強記者能之德秀益加器重紹定初汀邵盜作辟議幕參贊攝邵武縣後復攝軍事盜起唐石親勒兵討之後為樞密院編修兼檢討襄蜀事急議遣使講和時相依違不決史嵩之帥武昌首進和議堃言今日之事宜先定規模并力攻守上疏言八事繼為副都承旨奏請出師絕和使命淮東西夾攻不然利害將深理宗深然之令樞密院下三閫諭旨嘉熙元年輪

對采事係安危者四端而專以司馬光仁明武推說復
推廣前所言八事以孝宗講軍實激發帝意淳祐初自
江西赴闕奏祈天永命十事嵩之起復傾國爭之桀上
疏乞聽終喪後又言嵩之當顯絕而終斥益嚴君子小
人之限拜禮部尚書奏十事終之曰陛下一心十事之
綱領也前後奏陳皆明正剴竊鑿鑿可行其為兩浙轉
運判官以察訪使出視江防首嘉興至京口增修官民
兵船守險備具為江西轉運副使知隆興府繼有它命

時以米綱不便就湖口造轉船倉請事畢受代知鎮江府兼都大提舉浙西兵船江面幾千里調兵捍禦以守江尤重于淮瓜洲一渡甚狹請免鎮江水軍調發專一守江置遊兵如呂蒙所言蔣欽將萬人巡江上增創水艦就楊子江習水戰登金山指麾之是冬楊子橋有警急調湯孝信所領遊兵救之淳祐末遷沿江制置使江東安撫使節度和州無為軍安慶府兼三郡屯田行宮留守巡江引水軍大閱舳艫相銜幾三十里憑高望遠

考求山川險阨謂要務莫如屯田講行事宜修飭行宮
諸殿室推京口法創遊擊軍萬二千蒙衝萬艘江上晏
然寶祐二年拜端明殿學士簽書樞密院事封吳郡侯
與宰相不合言者攻之以前職主管洞霄宮卒贈七官
位特進堃因德秀朱熹之學知建寧府創建安書院祠
熹以德秀配工于詩書法祖唐歐陽詢

蔡抗字仲節處士元定之孫紹定二年進士其後差主
管尚書刑工部架閣文字召試館職遷祕書省正字升

校書郎兼樞密院編修官遷諸王宮大小學教授疏奏
權姦不可復用國本不可不早定帝善其言遷樞密院
編修官兼權屯田郎官遷著作佐郎兼侍右郎官江東
提點刑獄加直祕閣特授尚書司封員外郎進直寶章
閣尋加寶謨閣移浙東召為國子司業拜宗正少卿進
直龍圖閣知隆興府試國子祭酒拜太常少卿權工部
侍郎遷工部侍郎時暫兼禮部侍郎兼權吏部尚書加
端明殿學士同簽書樞密院事差兼同提舉編修經武

要畧同知樞密院事拜參知政事落職予祠起居郎林
存請加竄削從之未踰年復端明殿學士提舉洞霄宮
乞致仕轉一官守本官職致仕卒謚文簡以犯祖諱更

謚文肅

按宋史此下有張礪傳
無事蹟足錄今從刪

馬天驥字德夫衢州人紹定二年進士遷祕書省正字
校書郎升著作佐郎輪對假司馬光五規之名條上時
弊詞旨切直遷考功郎官入對言周世宗當天下四分
五裂之餘一念振刷猶能轉弱為強陛下有能致之資

乘可為之勢一轉移間耳遷祕書監直祕閣知吉州遷
宗正少卿以祕閣修撰知紹興府主管浙東安撫司公
事兼提舉常平權兵部侍郎授沿海制置使差知慶元
府改知池州兼江東提舉常平改知廣東兼廣東經畧
安撫使寶祐四年遷禮部侍郎拜端明殿學士同簽書
樞密院事封信安郡侯五年以殿中侍御史朱熠右正
言戴慶烜監察御史吳衍翁應弼等論罷依舊職提舉
洞霄宮景定元年知衢州以兵部侍郎章鑑論罷有旨

依舊職予祠起知福州福建安撫使以職事修舉升大學士改知平江府又改知慶元府兼沿海制置使提舉洞霄宮禡職罷祠咸淳三年追奪執政恩數送信州居住四年放令自便後卒於家

按宋史此下有朱熠饒虎臣戴慶珂三傳俱無事蹟

足錄並
從刪

皮龍榮字起霖一字季遠潭州醴陵人淳祐四年進士歷官主管吏部架閣文字遷宗學諭授諸王宮大小學教授兼資善堂直講入對請以改過之實易運化之名

一過改而一善著百過改而百善融遷祕書郎升著作
郎入對因及真德秀崔與之廉龍榮曰今天下豈無廉
者願陛下崇獎之以風天下執賞罰之公以示勸懲帝
以為然兼兵部郎官差知嘉興府召赴闕遷侍右郎官
兼資善堂贊讀又遷吏部員外郎兼直講入對言忠王
之學願陛下身教之於內帝嘉納遷將作監兼尚右郎
官祕書少監兼吏部郎中宗正少卿起居郎兼權侍左
侍郎兼給事中吏部侍郎兼贊讀封醴陵縣男遷集賢

殿修撰提舉太平興國宮召見進刑部侍郎加寶章閣
待制荆湖南路轉運使權刑部尚書兼翊善景定元年
四月拜端明殿學士簽書樞密院進封伯權叅知政事
兼太子賓客二年拜叅知政事仍兼太子賓客封壽沙
郡公三年罷為湖南安撫使判潭州四年以資政殿大
學士提舉洞霄宮以右正言曹孝慶論罷咸淳元年以
舊職奉祠殿中侍御史陳宗禮監察御史林拾先後論
劾削一官它日帝偶問龍榮安在賈似道恐其召用陰

諷湖南提點刑獄李雷應劾之雷應至官謁龍榮龍榮託故不出既退又斥罵之或以語雷應不能平遂疏其罪又謂每對人言有吾擁至尊于膝上之語詔徙衡州居住湖南提刑治衡州龍榮恐不為雷應所容未至而歿龍榮少有志畧精于春秋學性忼直似道當國不肯降志又以度宗舊學卒為似道所擯德祐元年復其官致仕二年太府卿栢岳乞加贈謚未及行而宋亡

沈炎字若晦嘉興人寶慶二年進士調嵯縣主簿廣西

經畧司准備差遣湖南安撫司幹辦公事討郴寇有功
改知金華縣擢為監察御史右正言左司諫殿中侍御
史景定元年拜右諫議大夫加端明殿學士同簽書樞
密院事兼太子賓客二年拜同知樞密院事兼權叅知
政事以資政殿學士提舉洞霄宮三年進大學士致仕
卒贈少保炎居言路嘗按劾福建轉運使高斯得觀文
殿學士李曾伯沿江制置司叅謀官劉子澄左丞相吳
潛然論罷右丞相丁大全及其黨與則為公論也

欽定續通志卷四百十一